

VII.

„Instructie van wege mijns genadigen Heere mijn[s] Heeren des Princen van Oraengien, Grave van Nassau etc. voir den Heere van Gothen van Ghend[t] Mr. Pieter de Rycke, Advocaet, Adriaen van Coninxloy¹, coopman, ende Cornelis Le Brun al[tgene] wat zy sullen te doen hebben tot Colen, Wezel, Duysburch ende daer omtrent volgens de commissi[e] die zy van zyne Exe hebben om te doen die collectatie van penningen van den Nederlandsche gemeynten terzelver plaetse wezende.” Copie contemporaine, portant la suscription susdite; même écriture que la pièce précédente. Brit. Mus. Cotton Mss. Galba C. IV, (22) 20.

[1570, le 15^e Juin.]

In den iersten naerdien zylieden zullen ontfangen hebben de Commissie van zyne Exe ende gesien den last henlieden bevolen zijnde, zullen [zy] ter sulcker plaetsen daer sy sullen moegen wesen doen vergadere[n] die van de Consistorien van den Walen ende Vlamingen die zy alda[er] vijnden sullen, te weeten die ministers, ouderlingen ende diacens van een ieder derzelve kercken. Diezelve alzoe vergadert zijnde sullen zy henlieden te kennen ge[ven] den last die zy van zyne Exe hebben.

Wesende alzoe bekendt voer genoechaem gequalificeert zullen [zy] laeten lesen de propositie henlieden gesonden sonder nochtans henl[ieden] dese reyse noch voir te houden alsulcken articulen als onder [de]zelve propositie gescreven staen.

Dezelve propositie gelesen zijnde sullen zij van de Consistorien be[goren] oft zy dinhouden derzelve voor goet ende christelijck houdon e[nde] indien zij tzelve advoueren zullen zy den Consistorien voirs. bidden [oft]

¹ Conf. la 2^e note à la page 16, ainsi que la thèse acad. de M. B. v. Meer, De Synode te Eindhoven 1571. 's Gravenh. 1892, p. 117.

zy willen eenigo middelen proponoren waerdoor die goede middel van zyne Exce mach volbracht worden, daerby vuegende d[at in] gebreke van dyen zy last ende bevel hobben te proponoren d[ie] articulen daerop dat men in Inghelandt besoineert.

Alsdan zullen die articulen mogen gelesen worden zoe vorre [de] vergaderinge tzelve goet vijnt.

Ende diezelve articulen gelesen zijnde sal men moeten aenhoud[en] aen die van den Consistorien opdat zy eenighe middelen soecken om diezelve articulen te wercke te stellen.

Waer zy daertoe gheen middel weeten zullen zy heneden voorhouden alzulcken middel als men in Inghelandt gebruyckt heeft, te weten dat in presentie van zynere Exce commissarissen ende den Consistorien zullen geroepen worden die voernaemste van der kercken in zulcken getale dat die ouericheyt der stadt off plaetsen daer tzelve geschien zal daerby nyet verstoort en wordde.

Ende wesende die voirs. propositie anderwerven gelesen in presentie van de voirs. notable ende voirnaemste der gemeenten sal bij die Commissarissen van zyne Exce verclaert wordden dat die Consistorien altzelve hebben geadvoueert, advoueren ende houden voer goet ende christelijck, daerby vuegende zeker vermaninghe om den ommestaenderen des te beter moet te gheven. Ende lesen daernaer die articulen doende daertoe eenige nyeuwe vermaninghe.

Dat gedaen zijnde zal een iegelijck apart ende besunder geroepen worden ende vermaent te willen leenen alle maenden zoeveel gelts als hem mogelijk is.

Tzelve alzoe volbracht zijnde sal men totten ouderlinck van elcken quartiere moeten committeren noch twee van de voirnaemste dewelcke tsamen daertoe zullen solliciteren alle arbeydtslieden particuliere die heuren cost coopen, dienaers ende dienersson ende zulcs daerinne besoineren dat nyemant vry oft exempt en blyve, als alleenlijck die kinderen, ende die aerne luydon levende van gemeene aelmocessen.

Ende voir zoo vele als in den voirs. articulen staet dat die van den consistorien zullen kiezen eenen ont-fanger generael gecoren worden uuyt het gantsche lichaem der kercken eenen op de Walsche zyde ende eenen op de Vlaemsche zyde.

Het denomineren ende kiezen des generaels zal geschieden by denzelve articulen, ten waere dat die Consistorien van anderen advise waren.

Het Consistorie metten generael sal in elck quartier eenen persoon kiezen dewelcke alle maenden het geheel quartier dore sal collecteeren ende brengen de collecte aen den generael.

Het zoude oyck seer goet sijn dat int collecteren al-tijts by den and[eren] waeren eenen Wael ende eenen Vlamijnck ende dat zy elck be[sunder] schreven ende schijckten tzelve den generael op dat men confrontieren dezelve schriften oft rollen jegens den anderen des te beter bevinden mochte oft daer eenich bedroch geschiede.

Die collecteurs zullen den contribuanten recepisse geven ten waere zy tzelve liever hadden van den ont-fanger generael in welcken gev[alle] hy daerinne voldoen zal.

Dontfanger generael zal alle maenden zyne rekeninghen Consistor[ien] overgeven dewelcke zyne Exce^e dienen zal voor een contrerolle.

Ist daer eenige swaricheyt viel oft weygeringe van betaling soe sal d'ontfanger generael de collecteur metten ouderlinck vant quartier remedie daerinne stellen.

Ondergeteekent
GUILLAUME DE NASSAU.

